



Kalaallit Nunaata imminut napatittup pilersinnissaa pillugu Danmarkimi naalakkersuisut Kalaallillu Nunaanni Naalakkersuisut tunngavissatut isumaqatigiissutaat

Tunngavissatut isumaqatigiissut Namminersorneq pillugu inatsimmi siunertarineqartunut tapersiutaassaaq. Danmarkimi naalakkersuisut Kalaallillu Nunaanni Naalakkersuisut pitsaasumik tatigeqatigiiffiusumillu suleqatigiipput. Danmarkimi nunatsinnilu naalakkersuisut Namminersorneq pillugu inatsit ataqqillugu suleqatigiinnerup annertusarnissaa isumaqatigiissutigaat.

Kalaallit Nunaata nammineq napatilernissaa anguniarlugu tapersersorniarlugulu suliniutissat aningaasaliissutissallu oqallisigineqaqqinnissaannut isumaqatigiissut una aqqutigalugu tunngaviliisoqarpoq. Tunngavissatut isumaqatigiissut aqqutigaluguttaaq suliniutissat aningaasaliissutissallu aalajangersimasut annertuut Kalaallit Nunaanut annertuumik sunniuteqartussat ilutigalugu isumaqatigiissutigineqarput.

Suleqatigiinnermi tunngavissat pingaarnerit

Danmarkimi naalakkersuisut Kalaallillu Nunaanni Naalakkersuisut siunissami suleqatigiissutissat eqqarsaatigalugit tunngavissat pingaarnerit arlallit isumaqatigiissutigaat:

1. *Atugarissaarnerulernissaq:* Danmarkip Kalaallit Nunaatalu suleqatigiinneratigut Kalaallit Nunaani suliniuteqarnikkut innuttaasunut isumaginninneq, peqqinnissaq ilinniartitaanerlu eqqarsaatigalugit ullutsinnut tulluuttunik atugassaqaartinneqarnissaat neqeroorfigineqartarnissaallu qulakkeerniarneqassaaq.
2. *Siunissaq ungasissoq isigalugu ineriartortitsineq:* Suleqatigiinnikkuttaaq Kalaallit Nunaanni aningaasaqarnikkut imminut pilersornissaq anguniarlugu ilaatigut attaveqaasersuutitut, inuussutissarsiutinik ineriartortitsinissamut nukissiuutitigullu sillimaniarnermut pilersuinissamut aningaasaliisarnissat pisassapput.
3. *Naligiilluni suleqatigiinnissaq:* Suleqatigiinneq ataqpeqatigiinnermik naligiinnissamillu tunngaveqartinneqarpoq, tassanilu suliniutissat aningaasaliissutissallu kalaallit pingaartitaat aallaavigalugit kalaallit danskillu oqartussaasuisa akornanni qanimut suleqatigiissutigalugit aaqqissorneqartassapput.
4. *Aningaasaliisarnissaq:* Suliniutit aningaasaliiffissalluunniit aalajangersimasut aningaasaliiffiginissaat oqartussaasut akulerutinnerisigut isumaqatigiissuteqarfigereernerisigullu aningaasaliissutigineqartassapput. Aningaasaliinissaq Folketingimiit akuerineqaqqaassaaq, taamasilluni qulakkeerneqassaaq aningaasaliinissamut toqqammavissat.

Suliniutit aalajangersimasut taakkulu aningaasaliiffigisarneri

Tunumi Ittoqqortoormiini nunap immikkoortuani nutaamik mittarfiliornissamut kiisalu Kujataani Qaortumi itisuumik sissiuqaliornissamut Danmarkip tamakkiisumik aningaasaliisuunissaa isumaqatigiissut una aqqutigalugu isumaqatigiissutigineqarpoq. Aningaasaqarnermut



Akileraartarnermullu Naalakkersuisup Finansministerillu naalakkersuisoqarfiit susassaqtut peqatigalugit suliniutit piviusunngortinnissaanut tunngavissat ataatsimoorlutik misissussavaat.

Aningaasaliissutissat pineqartut illersornissamut isumaqatigiissummi isumaqatigiissutit ilaattut atortunik Illersornissaqarfimmit innuttaasunillu atorneqarsinnaasunut Danmarkip aningaasaliissutigeriigaasa saniatigut aningaasaliissutigineqassapput.

Kalaallinut napparsimasunut Danmarkimi napparsimavinnut katsorsartikkiartortartunut tunngatillugu Kalaallit Nunaani Peqqinnissaqarfiup 1. januar 2026-mit annertusisamik, Kalaallit Nunaata maannamut tassunga aningaasartuutigisimasaasa annertoqataanik, aningaasaliiffigineqarnissaa isumaqatigiissutigineqarportaaq. Danmarkimi katsorsartikkiartornissamik innersuussisarnissat ilusissavia Peqqissutsimut Inunnullu Innarluutilinnut Naalakkersuisoqarfiup Danmarkimilu nunami namminermi peqqinnissamullu ministereqarfimmit suleqatigiissutigalugu suliarineqassaaq. Peqqinnissaqarfimmut tunngatillugu annertunerusumik ikiorseeqqissinnaaneq suleqatigiissinnaanissallu misissorneqarnissaat isumaqatigiissutigineqarpoq.

Aningaasaateqarfiusinnaasut assingusulluunniit

Danskit aningaasalersugaanik kalaallillu pingaarnertut nakkutigisassaanik aningaasaateqarfimmik arlalinnilluunniit pilersitsisinnaanissap eqqartoqarnissaa danskit kalaallillu naalakkersuisunit isumaqatigiissutigineqarpoq. Kalaallit Nunaata imminut napatittup aningaasatigut patajaatsumik inissisimanerulernissaa tunngavissinniarlugu iliuusissanut aningaasaliinissamut tunngavissat pitsanngorsarniarlugit suliniutit taamaattut aqqutigineqarsinnaassapput.

Sulinerup ingerlaqqinnissaa

Danmarkimi Kalaallillu Nunaanni naalakkersuisut isumaqatigiissutigaat:

1. Kalaallit Nunaanni atugarissaarnerulernermut ineriartornissamullu iluaqutitut suliniutit aningaasaliissutissallu aalajangersimasut pillugit eqqartueqqinnissamut tunngavissat isumaqatigiissut manna aqqutigalugu aalajangersarneqarput. Aningaasaliinissaq Folketingimiit akuerineqaqqaassaaq, taamasilluni qulakkeerneqassaaq aningaasaliinissamut toqqammavissat.
2. Suliniutissat aningaasaliissutissallu periarfissaalersut pisariaqartitsinerillu aallaavigalugit Danmarkimi nunatsinnilu naalakkersuisunit isummerfigineqarlutillu isumaqatigiissutigineqartassapput.
3. Suliassap ingerlaqqinnissaa tassunga ilanngullugit suliniutissat siuliani taaneqartut suliniutissallu nutaat allat Aningaasaqarnermut Akileraartarnermullu Naalakkersuisup Finansministerillu naalakkersuisoqarfiit susassaqtut peqatigalugit – Naalakkersuisut Siulittaasuata Naalakkersuisoqarfia aammalu Ministeriunerup Naalakkersuisoqarfia – qanimut suleqatigalugit ataqatigiissaarissapput.



Atuutilernissaa aamma sivilissusissaa

Isumaqatigiissut statsministerip Naalakkersuisullu siulittaasuata atsioreernerisigut
atuutsilersinneqassaaq. Isumaqatigiissutip atuuffissaa killiligaanngilaq, akunneriilli
isumaqatigiinnerisigut allanngortinneqarsinnaalluni.

København, ulloq 16. septembari 2025



Mette Frederiksen
Ministeriuneq



Jens-Frederik Nielsen
Naalakkersuisut Siulittaasuat